


Newspaper	Berita Harian
Date	19/6/2011



MUHYIDDIN menyampaikan ucapan pada perasmian Forum Perniagaan Malaysia-Afrika di Putrajaya, semalam.

AEC perlu wujud blok perdagangan serantau

Potensi Malaysia-Afrika belum diterokai sepenuhnya

Oleh Magendran Rajagopal
magendran@bharian.com.my

PUTRAJAYA: Asean dan Komuniti Ekonomi Afrika (AEC), terutama usahawan harus mewujudkan blok perdagangan serantau untuk dimanfaatkan bagi pembangunan ekonomi dua hala selain meneroka bidang pelaburan baru serta menarik lebih banyak pelaburan langsung asing (FDI).

Timbalan Perdana Menteri, Tan Sri Muhyiddin Yassin, berkata tahap perdagangan dan pelaburan sesama antara Malaysia-Afrika belum diterokai sepenuhnya dan usahawan kedua-dua negara perlu berusaha bersungguh-sungguh mengeksploitasi potensi masing-masing.

"Perdagangan Malaysia dengan Afrika hanya AS\$7.8 bilion (RM23.4 bilion) tahun lalu berbanding dagangan AS\$12 bilion (RM36 bilion) dengan Jerman walaupun negara itu hanya satu peratus daripada keluasan benua Afrika.

"Saya yakin masih banyak peluang ekonomi belum diteroka. Kedua-dua pihak juga perlu mewujudkan suasana ekonomi mesra pasaran dan peniaga untuk menggalakkan FDI dan memberi keyakinan kepada pelabur asing untuk membuat komitmen jangka panjang dalam perniagaan yang diceburi.

"Langkah ini dapat membantu membina kemakmuran ekonomi yang mapan Malaysia-Afrika dengan memperkukuhkan perkongsian perniagaan dan membangunkan ekonomi kedua-dua pihak," katanya dalam ucapan perasmian Forum Perniagaan Malaysia-Afrika



(MABF) di Pusat Konvensyen Antarabangsa Putrajaya, di sini semalam.

MABF dengan tema 'Meneroka Dimensi Baru', menjadi antara agenda utama Dialog Antarabangsa Langkawi (LID) 2011 edisi kesembilan selama tiga hari bermula hari ini, disertai 800 anggota delegasi termasuk 180 orang dari serata benua Afrika.

Muhyiddin menegaskan, jarak antara Malaysia dan Afrika bukan halangan dalam dunia telekomunikasi canggih sekarang dan mengesyorkan syarikat daripada kedua-dua pihak merapatkan jurang dalam mewujudkan peluang pasaran baru yang lebih menguntungkan.



Katanya, delegasi Afrika yang berada di sini sewajarnya mengenal pasti peluang di negara masing-masing dan memadankannya kepada rakan niaga di Malaysia dengan bantuan agensi kerajaan seperti Perbadanan Pembangunan Perdagangan Luar Malaysia (MATRADE) dan Lembaga Pembangunan Pelaburan Malaysia (MIDA).

Muhyiddin juga mengesyorkan mereka meninjau potensi Program Transformasi Ekonomi (ETP) Malaysia yang menawarkan peluang yang hebat untuk sektor swasta termasuk pelabur asing, umpamanya 131 Projek Permulaan (EPP) bernilai AS\$145 bilion (RM435 bilion) dan 60 peluang perniagaan bernilai AS\$117 bilion (RM351 bilion).

Antara lain, beliau merujuk kepada sektor elektrik dan elektronik, pendidikan, pelancongan, penjagaan kesihatan serta pendidikan sebagai industri yang mempunyai potensi lebih luas untuk menyumbang dengan ketara kepada pertumbuhan ekonomi bersama.

Katanya, pelabur asing dipelawa menjadi sebahagian agenda pembangunan ekonomi Malaysia yang menarik dan meneroka peluang perniagaan baik secara persendirian atau menerusi perkongsian dengan usahawan tempatan.

Muhyiddin juga memberi jaminan Kerajaan Malaysia akan bertindak selaku fasilitator dan meminta usahawan Afrika yakin dalam memainkan peranan mereka sebagai pelaksana.

Katanya, MABF boleh dijadikan batu loncatan untuk menjana idea perniagaan serta membina perkongsian perniagaan baru.